

sæpiùs solùm ad augendum meritum insectantur, nec facile, uti scrupulos, sine discriminé contemnentes, ad laxitates descendunt.

COROLLARIA PRACTICA.

SCHOLIUM. Ex his fluit: 1º Quòd licet usus confessionis generalis importunos sæpe gignat scrupulos verè tales et contemnendos, tam en hujusmodi confessio, semel saltē in juventute facienda, non tantū sæpe necessaria est, sed ferè semper ad sedandos scrupulos fortè rationales et non contemnendos utilis: quia pueritia communiter in peccatis minùs fortè excusabilibus, et vix per Sacra menta deletis, transigitur; 2º Licet repetitio confessionum particularium, dolor et propositum, secutā emendatione, confessio peccatorum sincerè facta, persolutio devota pœnitentiæ injunctæ, generet aliquoties scrupulos irrationales contemnendos, attamen scrupuli circa neglectam frequentiam Sacramenti pœnitentiæ, dolor et propositum sine emendatione, confessio obiter sine debito examine peracta, vel a Confessario sine debitib[us] quæstionib[us] deproperata, satisfactio luridè persoluta, vel incompetens a Confessario injuncta, scrupulos rationales non contemnendos generare poterunt; 3º Similiter, in ordine ad celebrationem et sumptionem SS. Eucharistie, licet contemnendi sint scrupuli irrationales, retrahentes a frequenti et devoto ejus usu, non tamen contemnendi sunt qui monent sancta sancte tractanda et non deproperanda esse; 4º Eodem modo non contemnendi sunt scrupuli qui nos ad perfectè satisfaciendum obligationibus statūs nostri et vitanda peccata quorum occasiones in eo frequentiores sunt, adhortantur, v. g. ad persolvendas rite horas canonicas, vota religiosa exactè observanda, præcepta Ecclesiæ perfectè implenda, detractiones vitandas, periculosa consortia fugienda etc. in quibus plerumque scrupuli rationales occurunt.

§ 87.

REGULÆ PRO SCRUPULO RATIONALI.

Ut autem sciatur quomodo quis cum scrupulis rationalibus non contemnendis gerere se debeat, sequentes regulæ observanda sunt.

I. Quando parum aut nihil refert quòd res sic vel aliter fiat, tune quidquid nimis subtiliter scrupulus reclamet, faciat quisque sine ulteriori consilio vel inquisitione quod primâ fronte sibi bonum aut melius representatur. Ita S. Thomas dans rationem: « Quia non multū refert utrū sic vel sic fiat: et ista sunt minima, quæ parum adjuvant vel impediunt, respectu finis consequendi: quod autem parum est, quasi nihil accipit ratio. » 1, 2, q. 14, a. 4. Ita etiam S. Franciscus Salesius, l. 8, *de Am.*, c. 14.

II. Quando agitur de re alicuius momenti, sive ad legem Dei præceptivam in parvo vel minimo observandam, sive ad perfectionem promovendam, tunc tantisper audiendus est scrupulus rationalis, usque dum præmissâ, pro ratione matterie, majori vel minori consultatione, satis innotescat id ad quod tenemur, vel saltē quod expediat. Ita iterum S. Thomas, l. c., art. 1 et 3, et S. Franciscus Salesius, qui monet *accipiendum consilium a Directore nostræ conscientiæ, adhibitis etiam, si libuerit, duobus aut tribus viris non mediocriter versatis in rebus spiritualibus*. Quippe sine hac consultatione facile fiet quòd culpabiliter contemnatur scrupulus qui non deberet contemni: unde gignuntur ignorantiae vincibles quæ non excusant.

III. Præmisso hoc examine, si scrupulus maneat et adhuc gignat prudentem formidinem: *fortè fallor*, subinde posthaberi potest in rebus ubi conjecturalis vel probabilis certitudo, vel solùm haberi potest, vel non obstat prudenti resolutioni de licito, v. g. de statu gratiæ et sufficienti dispositione ad recipienda Sacra menta, quæ ob verbum *fortassis fallor*, non sunt prætereunda. Sæpe verò non est contemnendus, si nimirum aliunde expediat facere quod dictat scrupulus, uti faciendum est, si non sit res obligatoria, sed saltē ut conferens ad perfectionem et majorem præcepti reverentiam: imò si nec animi perturbatio, nec alia causa contrarium suadeant, vix operans contra talem scrupulum a veniali excusabitur, v. g. si in die jejunii, urgente rationali scrupulo non contemnendo, sine causâ a potu chocolatæ non abstineat.

IV. Faciliori examine præmisso circa id quod expedit, facilius et utilius procedent tam scrupulosi quam alii, si eligant magis expediens ad perfectionem, juxta illud Apostoli : *Omnia mihi licent, sed non omnia expedient.* I Cor. x., 22. In cuius confirmationem Cornelius a Lapide allegat illud Clementis Alex., l. 3 Strom. : « Qui faciunt quidquid licet, facile dilabuntur ut faciant quod non licet. » Et S. Gregorius ait : « Solus in illicitis non cadit, qui se aliquando et a licitis cautè restringit. » L. 5 Mor., c. 8. Hoc item modo dubiis et scrupulis via facile präcluditur.

V. Eodem modo tam scrupulosi quam alii curare debent ut in electione opinionum probabilium eligant id quod magis conducit ad perfectionem. Regula hæc desumitur ex c. *Juvenis, de Spons.* : *In dubiis tutior pars est eligenda;* quod in scrupulo rationali, maximè pro illo qui Deo ut optimo amico, liberalissimo Domino, amandissimo sponso, unicè placere cupit, präcipue tenet : quia illa sententia, quod liceat sequi probabilem et minus tutam in concursu probabilioris et tutioris, nedum certa non est, sed a pluribus falsa reputatur. Unde S. Joannes a Cruce ait : « Si quis niteretur persuadere tibi aliquam laxiorem doctrinam, non credas illi, quantumvis illum videres miraculis confirmantem; sed crede potius doctrinæ austeritatis, pœnitentiæ et rerum omnium spoliacioni. » *Sent. Spir., sent. 72.*

VI. Non modò alienum a perfectione, sed etiam immune a culpâ non videtur dirigere scrupulosos sive alios, secundùm opinionem æquè vel minus probabilem, simulque minus tutam respectivè de peccato gravi et levi. Cùm enim de hoc adhuc inter Theologos lis sit, requiritur sufficiens diligentia pro faciendo recto dictamine reflexo de probabili et minus tutâ sententiâ tanquam licitâ sequendâ, quam pauci adhibent, et quâ etiam adhibitâ, vix tale dictamen securè fieri potest. Deinde minus probabile, in concursu magis probabilis, huic in electione präferri nequit; si enim hoc fiat quia est probabile, æquè vel magis probabile est oppositum; quâ ratione ergo illi präfertur? Rursus opinio tutior et probabilior de li-

cito est plus quam scrupulus, et rationabiliter dictat non solum fortè non licet, sed absolutè non licet; ergo prudenter contemni nequit : præsertim quia opinio minus tuta et minus probabilis ad summum solum rationabiliter dictat fortè licet, quod nequit fundare conscientiam prudentem, sed temerariam, de licto.

ADHORTATIO AD DIRECTOREM SCRUPULOSI.

COROLL. I. Curet ergo Director spiritualis, ut scrupulosum contuletur, sed cum magnâ discretione, secundùm consilium Gersonis Tr. de Sollie. Eccl. part. 13, 14, 15, ita ut non solum per regulas generales et proverbiales procedat, nec ad sola singularia respiciat, nesciens ea resolvere in sua principia, sed qui utrumque circumspectè præstare valeat. Nec sit ut medicus imperitus, qui eadem medicinâ pro omnibus morbis utitur; sed circumstantias bene attendat, ut modò affirmet, modò neget cum sanâ ratione, licet ratio disparitatis non facilè appareat, eo modo quo in Evangelio docemur opera bona manifestare, et non manifestare. « Et quoniam rarissimi sunt tales circumspecti, requiritur enim cum eruditione longus experientia usus, non expedit passim ab omnibus querere solidum pro moralibus consilium; neque similiter præsumere illud dare quisque debet, præsertim non habitâ cum suis circumstantiis omnibus verâ casûs formâ qui queritur. » Præterea, Director scrupulosum benignè et cum charitate tractet, sed iterum cum magnâ discretione; unde sicuti in scrupulis irrationalibus non persona, sed scrupuli contemnendi sunt, ita in scrupulis rationalibus de licto justè judicare debet, et juxta Bellarminum : « Si quis velit in tuto salutem suam collocare, is omnino debet certam veritatem inquirere... Et si rei certitudo non possit ad liquidum apparere, debet omnino tutiorem partem sequi. » Append. ad Opusc. de Princ. christ. Nec sola discretio in his erga scrupulosos tenenda est, sed in multis aliis, cum zelo ut proficient: quod obtinebit Director si bene perpendat quis verè sit scrupulosus, quis non; qui nam sint veri scrupuli, quinam non; et si ferè in omnibus non tam scrupulos elevet, quam bene temperatos in suo proprio loco collocet: nempe si fortiter et suaviter inducat scrupulosum ut, contemptis inanitatibus, non contemnat peccata tam gravia quam levia et levissima, et animo pacato ad perfectiora contendat.

ADHORTATIO AD SCRUPULOSOS.

COROLL. II. Scrupulosus item solidam consolationem inveniet, si cum humili docilitate et seriā proficiendi voluntate et fiduciā in Deum, apud optimum Directorem eam quærat. Quærenda est autem hæc consolatio non in evacuando timore, sed eum cum spe contemperando; nec in contemnendo omnes scrupulos, sed eos in zelo proficiendi; non ex nimio timore peccati, sed amore majoris Dei beneplaciti, collocando. « Non timeant, ait S. Augustinus, imperfecti; tantum proficiant: nec quia dixi, non timeant, ament imperfectionem et ibi remaneant ubi inventi sunt; tantum proficiant quantum in ipsis est. In Ps. cxxxviii, 46. Si enim hoc non faciunt et solum peccatum mortale fugere velint, sive laborent scrupulis contemnendis, sive non, de hoc ipso facere sibi debent scrupulos maximè rationabiles: nec excusat eos, si querant Directorem qui eos ex hoc statu educere non euret, de quâ conniventia semibonorum Confessariorum conqueritur S. Theresia: « Qui quod erat peccatum veniale dicebant mihi nullum esse peccatum, quod erat mortale gravissimum dicebant esse veniale. Hoc mihi tantum damni fecit, ut superfluum non sit hic illud enarrare ad aliarum præcautionem in re ita gravi; nam coram Deo, ut bene video, excusatio non erat: siquidem sufficiebat quodd res essent naturâ suâ non bonæ ut ab his abstinerem. Credo Deum ob peccata mea permisisse quodd illi seducerentur et seducerent me, atque seducerem etiam ego multas alias, dicendo illis quod mihi dictum erat. » C. 5 Vit. Tremenda theologia de ignorantibus sæpe vincibilibus. Quia verò vel ex vel sine nostrâ culpâ, non est in potestate Directoris semper ut scrupulis medeatur, non est cadendum animo, sed cum resignatione crux ista, licet pro culpâ propriâ, in spe sustinenda est, usquedum Deus provideat.

§ 88.

MORTIFICATIO QUID?

Præter orationem, de quâ, ejusque impedimentis, huc usque egimus, ad tendendum ad perfectionem christianam, maximè in viâ purgativâ pro incipientibus, secundum medium est *mortificatio*, quæ est quodlibet opus pœnale, quod liberè

facimus vel patimur, ut, mortui vitæ pravæ, bene de novo vivamus.

EXPLICATUR.

SCHOL. I. Mortificatio dicitur 1º *Opus*, seu exercitium actuale potius quam habitus, quia species mortis quam induit, unde etiam mortificatio dicitur, in exercitio bene vivendi, cum exclusione exercitii male vivendi, consistit. Dicitur 2º *Opus pœnale*, quodcumque illud sit, dummodo liberè fiat vel acceptetur; nam mori, vel vitam vitiosè actam tollere, non fit sine pœna: nec fit virtuosè, nisi fiat liberè; sive quatenus voluntariè quis eligit aut acceptat id quo usque ad mortem vitæ malè actæ et inductionem vitæ perfectæ, cruciatur. Hic enim est finis mortificationis: quia aliâs eligere, vel pati talem pœnam, indifferens vel pravum opus foret.

MORTIFICATIO EST VIRTUS.

SCHOL. II. Mortificatio est virtus ad temperantiam in genere acceptam, refranantem omnes cupiditates, ut pars ejus potentialis reductivè spectans, quia retrahit ab inordinatis appetitibus: et quia impellit etiam contra inordinatos timores, etiam naturam fortitudinis in communi participat: et quia hæc fortitudo exercetur tam sustinendo quam aggrediendo, id est, tam voluntariè pœnalia et appetitui contraria eligendo, quam voluntariè illa acceptando, ex fine purgandi et purificandi animam. Ideo Ascetae duas purgandi vias distinguunt: activam, quæ est magis propria incipientium, et passivam, propriam proficientium et unioni perfectæ proximorum: utramque autem viam subdividunt in *interiorem*, quæ sensus et potentias internas, et *exteriorem*, quæ sensus externos, refrænet, juxta illud: *Licet is, qui foris est, noster homo corrumpatur: tamen is, qui intus est, renovatur de die in diem.* II Cor. iv, 16. Secundum hanc divisionem, etiam homo distinguitur in *interiorem* et *exteriorem*, et pro *interiori* contra *exteriorem* semper pugnat mortificatio, juxta illud: *Caro concupiscit adversus spiritum.* Gal. v, 17. Condelector legi Dei secundum *interiorem hominem*; video autem aliam legem in membris meis, repugnantem legi mentis meæ. Rom. vii, 22.

§ 89.

MORTIFICATIO EST NECESSARIA.

*Mortificatio* in aliquo gradu non modo conducit, sed etiam *necessaria est* ad vitam non tantum perfectam, sed et *christianam*. Probatur 1º ex S. Scripturâ, ubi Christus non solum ad discipulos, sed ad omnes, uti patet *Luc. ix*, 23, ait : *Si quis vult post me venire, abneget semetipsum. Matth. xvi*, 24. Ergo quia nonnisi eundo post Christum salus obtinetur, ad eam abnegatio, seu mortificatio requiritur. Ut enim 2º inter alios PP. notat S. Chrysostomus, *Hom. 56* : « Sic igitur Christus non dixit tamen : non parcas; sed significantius ac expressius : denega te ipsum..... certaminibus te offer, et quasi alias patiatur, sic afficiare, non dixit : neget, sed abneget, ut hac adjunctiunculâ plurimum agat, cum abnegare multò plus quam negare profectò sit. » Et S. Basilius ut omnibus præceptum accipit renuntiare sua et se et omnibus affectionibus carnis et mundanis, imò ipsi vitae, in quantum « perfectioni Evangelii salutis adversantur, et pietatis studium... valeant impedire. » *Reg. fusior. interr.*, 8. — 3º « Manere in baptizatis concupiscentiam, vel fomitem, sancta Synodus Tridentina, *Sess. 5, can. 5*, fatetur et sentit : quae cum ad agonem relicta sit, nocere non consentientibus, sed utiliter per Christi Jesu gratiam repugnantibus, non valeat : quinimò qui legitimè certaverit, coronabitur. » Ergo ut per gratiam in baptismo susceptam demum coronemur, opus est per totum vite agone legitimè contra concupiscentiam et fomitem, hostem nostrum internum certare, illi non consentire, arma illi non cedere, sed fortiter repugnare, quae est ipsissima a Christo præcepta abnegatio et mortificatio, quam S. Paulus, *Coloss. ii*, 11, sub nomine circumcisionis, in *circumcisione Christi*, proponit. — 4º Necessitatem mortificationis probat satisfactio pro peccatis nostris personalibus Deo præstanda, quae, juxta idem Tridentinum, *Sess. 6, c. 8* : « Non sit tan-

tum ad novæ vitae custodiam et infirmitatis medicamentum, sed etiam ad præteriorum peccatorum vindictam et castigationem : » sine quā homo inferior seu exterior, contra superiorem et interiorem continuò pugnans, vinci non poterit. — 5º Id probant vitia, passiones, sensus et potentiae, tentationesque intra et extra, tam in corpore quam in animâ contra nosmetipos incessanter pugnantes, quae sine mortificatione vinci non poterunt, uti ex dicendis patebit; sicuti etiam eadem ad exercenda bona opera, virtutesque implantandas, requiritur. » Hic namque est gladius, ait Abbas Pynuphius apud Cassianum, qui illum noxium sanguinem, quo animatur materia peccatorum, salubriter fundens, quidquid repererit in membris nostris carnale terrenumve concretum, resecat et abscedit, ac mortificatos vitiis vivere Deo et spiritualibus facit vigere virtutibus. » *Collat. 20, c. 8*.

QUOMODO MORTIFICATIO EST NECESSARIA.

**SCHOLIUM.** Dictum est mortificationem esse necessariam omnibus in aliquo gradu, qui etsi in individuo omnino determinari non possit, est tamen in genere gradus ille quo aliquis disponatur ad observandum maximum præceptum amoris Dei super omnia et reliqua mandata tum actu suis temporibus, tum habitu in præparatione animi. Et quia huic observationi nihil magis obest quam concupiscentia, vitia, passiones et tentationes, mortificatio haec omnia refrænans, ne contra observantiam legi Dei debitam prædominentur, omnibus est necessaria.

§ 90.

MORTIFICATIO ULTRA OBLIGATIONEM STRICTAM EXTENDENDA EST.

*Mortificationi* autem eò magis assiduè, diligenter et exactè, ultra metas strictæ obligationis insistendum est, quò magis de vitâ sufficenter christianâ certi esse et magis proficere et ad perfectionem tendere volumus. Probat hoc, præter proba-

tiones § præc. allatas, S. Scriptura. *Si quis vult post me venire, abneget semetipsum, et tollat crucem suam quotidie, et sequatur me.* *Luc. ix, 23. Semper mortificationem Jesu in corpore nostro circumferentes.* *II Cor. iv, 10. Ubi notandi sunt termini quotidie, semper, quia assiduam mortificationem commendant.* Unde 2º eam etiam PP. inculcant. S. Hieronymus : « Ne semel putemus posse sufficere, semper crux portanda est, ut semper nos Christum amare deceamus. » In c. x *Matth.* Et S. Augustinus : « Inter omnia christianorum certamina sola duriora sunt prælia castitatis, ubi quotidiana est pugna et rara victoria. » *Serm. 20, de Temp., c. 2.* — 3º Tepiditas est fugienda et ad perfectionem christianam omnes tendere tenentur; sed hæc sine mortificatione prestat non possunt, nam juxta lib. de *Imit. Christi* : *Tantum proficies, quantum tibi ipsi vim intuleris.* Ergo etiam mortificatio est necessaria. — 4º Oratio tum vocalis, tum mentalis, est medium necessarium ad perfectionem; ergo etiam assidua mortificatio, quia sine hac oratio attenta, devota et fructuosa non erit, cum omnia hæc sine mortificatione non obtineantur. Unde etiam in S. Scripturâ oratio cum jejunio, *Tob. xii, 8, et Matth. xvii, 20,* commendatur: nam ut S. Bernardus ait: « Jejunium orationi devotionem et fiduciam donat. Oratio virtutem impetrat jejunandi, et jejunium gratiam promeretur orandi. » *Serm. 4 Quadrag.* Unde etiam idem Sanctus mortificationem magis perfectam, *Serm. 7 Quadr.*, dividit in mortificationem, peregrini juxta illud: *Obsecro vos tanquam advenas et peregrinos, abstinere vos a carnibus desideriis, quæ militant adversus animam,* *I Petr. ii, 11; mortui, juxta illud: Mortui estis, et vita vestra est abscondita cum Christo in Deo,* *Coloss. iii, 3; et crucifixi, juxta illud: Mihi absit gloriari, nisi in cruce D. N. J. C., per quem mihi mundus crucifixus est, et ego mundo.* *Gal. vi, 14.* Juxta quæ S. Pater subdit: « Peregrinus, si prudens est et non oblitiscitur suæ peregrinationis, licet cum labore, transit et non magnoperè secularibus implicatur. Mortuus æquè blanda hujus seculi, sicut aspera spernit. Qui verò raptus est usque ad tertium cœlum, crux illi est omne cui mundus in-

hæret, et his adhæret quæ mundo crux esse evidentur. » Jugem hanc mortificationem genus martyrii esse dicit: « Illo quo membra cæduntur ferro, horrore quidem mitius, sed diuturnitate molestius. *Serm. 30, in Cant.* »

GRADUS MORTIFICATIONIS.

SCHOL. I. Mortificationi multiplicitate incumbendum est, si serio ad perfectionem tendere velimus. — 1º Enim diligenter mortificare nos debemus ad vitanda peccata gravia: « *Si secundum carnem vixeritis, moriemini: si autem spiritu facta carnis mortificaveritis, vivetis.* *Rom. viii, 13.* — 2º Ad vitanda etiam venialia, ad præcavenda securius mortalia; sicuti Nazaræi omne quod inebriare potest usque ad acinum, *Num. vi, 4,* prohibebatur. — 3º Ut a rebus etiam licitis amore Dei abstineamus, uti David fecit *II Reg. xxiii, 16,* quando aquam sibi sitienti allatam noluit bibere, sed libavit eam Domino. — 4º Tum sponte utendo macerationibus voluntariis, jejuniis, ciliciis etc., tum sponte acceptando adversa, undevicunque proveniant, uti agritudines, tentationes etc., quæ ratione Christus S. Petro dixit: *Cum essem junior, cingebas te, et ambulabas ubi volebas: cum autem senueris, extendes manus tuas, et alius te cinget, et ducet quod tu non vis.* *Joan. xxi, 18.*

MORTIFICATIO OMNIBUS NECESSARIA.

SCHOL. II. In nullo igitur statu sine assiduâ mortificatione perfectio christiana acquiri potest. Quippe pro secularibus et uxoratis eam inculcat Apostolus: *Qui habent uxores, tanquam non habentes sint, et qui flent, tanquam non flentes; et qui gaudent, tanquam non gaudentes; et qui utuntur hoc mundo, tanquam non utantur* *I Cor. vii, 29;* quæ est abrenuntiatio illa quam omnes in baptismo fecerunt, et abnegatio seu mortificatio resecans superflua et ferens equanimiter contraria. Hoc item multò magis requiritur in Religiosis, qui effectu mundum reliquerunt, sed non sufficienter nisi etiam per omnimodam suî abnegationem affectu relinquant, juxta illud: *Qui non renuntiat omnibus quæ possidet, non potest meus esse discipulus.* *Luc xiv, 33.* Ex ejus considerationis defectu errant illi Religiosi, qui cum in mundo opulenta et eximia reliquerint, in claustris pro scalpelio aliisque ejusmodi minutis commoventur. Eodem modo singuli vitæ christianæ gradus incipientium,

proficientium et perfectorum, mortificatione indigent, quā tum purgentur a vitiis et peccatis, tum ad comparandas virtutes illuminentur et Deo uniantur; nam omnis perfectio in quocumque gradu, in correspondente gradu charitatis consistit, quae eò magis crescit quod magis cupiditas per mortificationem minuitur: nam *nutrimentum charitatis*, teste S. Augustino, est *iminutio cupiditatis*. L. 83, *q̄uest. in 36*, post init. Nec titulo acquisitæ perfectionis excusatur quis a labore minuendi cupiditates ac activè et passivè se purgandi, quia Dominus dicens se esse vitem, Patrem, agricolam, et justos, palmites, subdit: *Omnem qui fert fructum, purabit, ut fructum plus afferat. Joan. xv, 2.* Ubi S. Thomas ait: «Etiam si purus existat, quia nullus est adeo purus in hac vitâ ut non sit magis magisque purgandus.» *Lect. 1.* Nam, uti notat S. Bernardus: «Credite mihi, et putata repullulant, et effugata redeunt, et reaccenduntur extincta, et sopita denuò excitantur. Parum est ergo semel putasse, saepē putandum est, imò, si fieri possit, semper: quia semper quod putari oporteat, si non dissimulas, invenis. Quantumlibet in hoc corpore manens profeceris, erras, si vita putas emortua, et non magis suppressa.» *Serm. 58, in Cant.*

§ 91.

MORTIFICATIO INTERNA QUID?

A mortificatione in genere ad mortificationem in specie progredimur, et quidem 1º ad *internam*, quae sensus et potentias internas, scilicet malos vitiorum habitus, passiones, memoriam, intellectum et voluntatem refrænat.

§ 92.

MORTIFICANDI MALI VITIORUM HABITUS.

1º Igitur, quia per repetitos actus peccaminosos mali *habitus vitiorum* in nobis generati fuerunt, ad peccandum nos disponentes et inclinantes, cùm consuetudo sit altera natura, allaborandum est ut p̄afati mali et vitiosi *habitus mortificen-*

*tur* et funditus extirpentur. Probant hoc omnes rationes quas alibi pro fugiendo peccato mortali, veniali, et teperc, attulimus: quibus hæc etiam ratio accedit, quod in horto animæ nostræ non possint implantari virtutum germina, nisi priùs extirpata fuerint vitiorum zizania; unde etiam Deus Jeremiam monuit *ut evellet, et destruat, et disperdat, et dissipet*: et postea modò, *ut ædificet et plantet. Jer. 1.*

EXSTIRPATIO VITIORUM CAPITALIUM.

SCHOLIUM. Cùm septem peccata capitalia sint veluti radices omnium aliorum peccatorum, contra ea ab initio conversionis mortificationis gladius in nomine Domini stringendus est: quia illis extirpatis, alia vitiorum germina ex iisdem pullulantia consequenter evellicantur. Quoad motiva autem illa vitia mortificandi et extirpandi, et quoad actus quibus extirpantur, inter alios Ascetas videri possunt apud P. Joannem à Jesu-Mariâ *Instr. Nov.*, c. 21, et P. Kazenberger *Scient. sal.*, p. 2, c. 2 et seq. Generalia remedia pro iis mortificandis inferius assignabuntur.

§ 93.

PASSIO QUID?

Ad eradicando pravos vitiorum habitus, necessaria est mortificatio passionum. Est autem *passio* affectus seu appetitus sensitivus vehementior, cum extraordinariâ humorum commotione in corpore conjunctus.

EXPLICATUR.

SCHOL. I. Cùm bonum nobis repræsentamus, aut ope sensuum et imaginationis confusè illud nobis sistimus, aut ope intellectus distinctè nobis exhibemus. Appetitus ille, seu conatus ad bonum consequendum et eo fruendum, qui ex repræsentationibus sensuum confusis oritur, vocatur *appetitus sensitivus*; qui autem ex distinctis et ope intellectus formatis repræsentationibus originem suam trahit, dicitur *appetitus rationalis*: et eodem modo circa malum

se habet aversatio, seu nitus et conatus malum fugiendi et abegendi. Appetitus sensitivus fit vehementior, si sensuum et imaginationis ope plura nobis bona representantur, et tunc, si cum extraordinario vel vehementiori corporis motu conjungatur, dicitur *passio*; vel si cum nonnullis modernis philosophari subtiliter velis, vocatur *affectus*, qui si ita invalescat ut, quacumque ex causâ, etiam levissimâ, excitetur, *passio* appellatur: motus autem dicti vehementiores in corpore, ex vehementiori humorum commotione oriuntur.

PASSIONUM NATURA.

SCHOL. II. Omnis affectus et passio, vel in voluptate, vel tædio consistit. Quippe anima boni vel mali perceptione mutatur et afficitur: quæ mutatio *animi motio* a philosophis vocatur; haec si jucunda sit, ex bono obtento vel obtainendo orta, *voluptas* dicitur, et quidem si bonum, verum bonum fuerit, *voluptas vera*; si apprens, *voluptas apprens*: si verò *mutatio* molesta fuerit ex boni jacturâ vel malo illato aut inferendo nata, *tædium* vocatur, quod iterum pro ratione mali veri vel apparentis, verum vel apprens dici potest. Status verò in quo tunc animus versatur, *gaudium* vel *tristitia* a philosophis modernis appellari solet.

PASSIONUM DIVISIO.

*Passiones partis concupisibilis*: — *Amor*. — *Concupiscentia*. — *Gaudium*. — *Odium*. — *Fuga*. — *Tristitia*.

SCHOL. III. Passiones propriè tales in solo appetitu sensitivo resident, et vocantur ideo passiones, quia, ex modò dictis, naturaliter ex apprehensione objecti convenientis vel inconvenientis, præsentis, absentis, vel imminentis, absque voluntatis imperio ante ipsius liberum consensum, quandoque et ipsâ repugnante, in appetitu sensitivo oriuntur et consequenter magis illas patimur quam per ipsas agimus. Appetitum sensitivum Theologi Mystici in duas partes dividunt: prima est *concupisibilis*, quæ bonum appetit et ad illud consequendum, vel eo obtento fruendum fertur, et consequenter etiam malum aversatur. Passiones partis concupisibilis sex Mystici assignant scilicet 1° *Amorem*, seu voluptatem de bono simpliciter concepto; 2° *Concupiscentiam*, quæ ab aliis etiam cupiditas et etiam desiderium vocatur, est prægustus voluptatis ex bono absente, quod nobis præsens esse mallemus; et easdem quas

amor in corpore mutationes producit, sed cum majori vehementiâ, quæ subinde usque ad ardorem, effervescente nimis sanguine, excrescere solet; 3° *Gaudium*, seu delectationem, seu voluptatem exuberantem, ex boni præsentia ortum, in quo cor similiter dilatatur et uberiorem excipit et emitit sanguinem; 4° *Odium*, seu tædium et aversionem, quo appetitus afficitur, cùm malum, vel aliquid sibi contrarium repræsentatur; 5° *Fugam*, seu abominationem, sive prægustum tædii ex malo absente percipiendi, si præsens fieret, quæ easdem cum odio in corpore mutationes, sed multò intensiores producit; 6° *Tristitiam*, quam nonnulli dolorem vocant, et qua est ingens tædium, quo appetitus a malo præsenti vexatur et opprimitur.

*Passiones partis irascibilis*: — *Spes*. — *Audacia*. — *Desperatio*. — *Timor*. — *Ira*.

SCHOL. IV. Altera pars appetitus sensitivi, juxta Mysticos, est pars *irascibilis*, quæ in id quod bonum impedit, insurgit; cùm enim multiplex arduitas bona quæ cupiuntur, ambiat, irascibilis veluti armatâ manu cum arduitate congregatur, eamque depellit et ita concupisibilem in liberam fruitionem boni asserit. Passiones illius sunt 1° *Spes*, seu voluptas ex bono obtinendo arduo concepta cum motu appetitus ad acquirendum bonum paratu difficile, quod concupiscentia amat et quod parari posse judicatum est; 2° *Audacia* ex spe generatur, et ex tædio mali, adversus molestias et labores in eo vincendo, et bono arduo consequendo progreditur; 3° *Desperatio* est ingens tædium, quo appetitus opprimitur et dejicitur, cùm quis bonum arduum, quod amat, consequi se non posse existimat; 4° *Timor* est tædium a malo adventuro perceptum, quo appetitus deprimitur, quando malum arduum imminet; 5° *Ira* est tædium ingens de malo arduo nobis illato, quo appetitus ad vindictam pro illatâ injuriâ sumendam excandescit, quam sibi bonam existimat.

PUGNA PARTIS INFERIORIS CONTRA SUPERIOREM.

SCHOL. V. Passiones de se non modò indifferentes, sed etiam bonæ sunt; facilè tamen et passim jam una, vel alia, jam plurimæ per immoderantiam insolescunt, et non modò in actu primo et habitu, uti in fomite et vitiis, sed etiam in actu secundo, per ejusmodi affectiones inordinatas primò indeliberatas, mox verò deliberatas, calcaria sunt, quibus admotis, pars inferior sensualis et bruto ef-

fræno similis, vigere non desinit, donec animam præcipitet. Postquam enim per peccatum originale justitiam originalem amisimus, per quam impedithebatur rebellio carnis adversus spiritum, ita ut promptissimè ratio et voluntas hominis Deo, appetitus verò sensitivus rationi et voluntati per omnia subjicerentur, in pœnam originalis peccati orta est in nobis rebellio carnis adversus spiritum, et duplex portio voluntatis inferior, seu appetitus sensitivus, et superior, seu appetitus rationalis, inter quos est pugna continua: quia appetitus sensitivus tantùm appetit carni delectabilia, v. g. voluptates carnales gulæ et luxuriæ, honores, divitias, commoditates, proprium suum interesse, vult tantùm sequi suum judicium, suam voluntatem et sibi bene esse. Appetitus verò rationalis intendit bonum honestum, observare mandata Dei et superiorum, renuntiare voluptatibus, honoribus, divitiis, vult amare Deum, odire seipsum, sequi aliorum judicium et voluntatem. Inter has duas voluntatis portiones est pugna continua passionum usque ad mortem hominis et semper una vel altera vincit.

§ 94.

PASSIONES INORDINATÆ MORTIFICANDÆ SUNT.

Usque ad mortem contra passiones portionis inferioris voluntatis, seu appetitus sensitivi, certandum est, illæque mortificandæ sunt. Ita jubet 1º S. Scriptura: *Post concupiscentias tuas non eas. Eccli. xviii, 30. Desideria carnis non perficietis. Gal. v, 16.* Nam: *Si secundum carnem vixeritis, moriemini; si autem spiritu facta carnis mortificaveritis, vivetis. Rom. viii, 13.* — Idem 2º docent SS. PP. S. Augustinus ad illud: *Post concupiscentias tuas non eas*, notat: « Volunt post te ire, noli post eas ire... rebellant, rebella; pugnant, pugna; expugnant, expugna; hoc solùm videto, ne vincant. » *Serm. 45, de Temp., c. 3.* Et S. Dorotheus ait: « Qui passionem exercet et ulciscitur, homini puto similem qui sagittam suis manibus arripiens, cordi proprio infigit. Qui verò passionem comprimit, similis est percuesso quidem sagittâ ab hoste, sed nusquam vulnerato ob thoracem quem indutus est. Qui autem eradicat et evellit passionem, similis est percuesso qui-

dem, sed sagittas arreptas manibus confringenti, aut illas in hostis cor detorquenti, ut canitur in *Ps. xxxvi, 15: Gladius eorum intret in corda ipsorum, et arcus eorum confringatur. Doctr. 10.* — 3º Ratio est ex Gerson: « Quia ex passionibus vitia et peccata nascentur; sunt enim veluti funiculi quidam, qui ad hoc vel illud quasi vincos homines trahunt: sunt veluti quidam igniculi, quibus inflammamur et accendimur: stimuli qui nos frequenter pungunt et angunt: sunt veluti nervi, quos iquando contrahimus, aliquando extendimus: venti, quibus noster animus tanquam mare procellosum perpetuò exagitatur: clavi denique, quibus miser homo configitur, et nubes, quibus mens et ratio obscuratur. » *Tr. de Pass., cons. 8.*

MODUS PASSIONES MORTIFICANDI.

SCHOLIUM. Modus medendi passionibus, easque mortificandi, juxta Joannem a Jesu-Maria, *Instr. Nov., c. 3,* omnium prudentissimis est, qui a præsentium affectione ad æternorum amorem cor hominis traducere tentat. Si enim divinæ sapientiæ opus in hominis creatione perscrutemur, inveniemus profectò noluisse clementissimum Deum passionibus pastum auferre, sed eas ad meliora bona transferre, ut unà cum hominis parte superiore sensus et appetitum et carnem quoque ipsam erudit, ut Deum pro captu suo sitiat et in eum assurgat. Hinc amor moderandus est, ne delectabilia mundi, sed Deum et virtutem et propter Deum cetera amet. Concupiscentia moderanda est, ut nonnisi animæ corporisque utilia in ordine ad æternam salutem consequendam et Deum in æternâ gloriâ videre desideremus. Gaudium moderandum est, ut de Deo infinitisque ejus perfectionibus et de bonis proximi gaudeamus. Odium moderandum est, ut non in inimicos nostros et mundi hujus adversa, sed in peccatum feratur. Fuga moderanda est, ut fugiamus peccata, eorum occasiones, mala consortia, prava colloquia, non verò cruces, persecutions et castigations corporis. Tristitia moderanda est, ut tristemur de nostris et alienis peccatis, qui sunt offensa summi boni. Spes moderanda est, ne feratur in bona transitoria, sed æterna. Audacia moderanda est, ne homo aggrediatur opera ardua et periculosa supra vires suas, sed secundùm Dei voluntatem opera difficilia, generosè malis resistat, peccata impedit et malos justè puniat. Desperatio moderanda est, ne homo desperet de gratiâ divinâ, de salute æternâ, et mediis eam consequendi, sed

in bonitate, omnipotentiâ et promissionibus Dei confidat. Timor moderandus est, ut timeamus Deum, qui corpus et animam potest perdere in gehennam, peccatum et offensam Dei, non verò adversa hujus mundi. Ira moderanda est, ne excedat, vel deficiat, sive in modo irascendi, sive in appetitione vindictæ, sive in illatione poenæ injustæ. Alia adhuc remedia inferiùs præscribentur.

§ 95.

MEMORIA QUID?

Mortificationis virtus, cum divinâ gratiâ, est remedium quod Deus nobis, ad corrigendos excessus appetitûs sensitivi ejusque passiones, constituit; sed quia etiam in superiori hominis parte, scilicet memoriâ, intellectu et voluntate, quasi passiones spirituales inordinatæ, seu graves excessus et deordinationes contingere possunt, scilicet in memoriâ vanæ et inutiles cogitationes, in intellectu judicia erronea circa veritatem apparentem, in voluntate distortæ complacentiæ, volitionesque circa bonum delectabile in præjudicium boni honesti et rationalis, ideo etiam his per mortificationem subveniendum. Et quidem 1° *memoriae*, quæ est facultas animæ quâ ideas rerum olim perceptarum in animum revocare possumus.

EXPLICATUR.

SCHOLIUM. Memoria ad revocandas ideas olim perceptas multùm adjuvatur a phantasiâ quæ est facultas animæ, rerum ideas aliquando sensu perceptarum reproducendi, seu refingendi et denuò percipiendi, licet illæ modò sint absentes; perceptiones verò reproductæ *phantasmata*, *species* vel *visa* appellantur. Cùmque non una in omnibus phantasiæ, sic neque eadem in illis memoria vis reperitur. Si verò pristinæ rerum ideæ ita in animo recurrent, ut simul cognoscamus illas jam olim animo observatas esse, tunc reminisci dicimur. Ex quo patet, quòd licet phantasia, memoria et reminiscientia sint facultates reipsâ distinctæ, ita tamen inter se conjunguntur, implicantur et coharent, ut vim suam simul et suâ sponte ferè semper exserant. Ex quo moderni philosophi magnam phanta-

siae vim in memoriam et reminiscientiam colligunt, censemque legem phantasiæ etiam ad utrumque extendi, quòd præsentibus et reproductis in animo quibuscumque rerum ideis simul ad animum redeant ideæ rerum absentium olim simul perceptarum, quæ vide-licet vel præsentium quas intuemur, partes sunt, vel quas cum præsentibus simul hausimus; quæ ideæ, ideæ sociæ vocantur, et lex ista a modernis associatio idearum vocatur, qui simul notant ex pluribus ideis sibi ita associatis illas maximè recurrere, quæ vel majorem inter se habent similitudinem, vel sèpiùs in mente simul coexistenterunt, vel præsenti animi tono magis consonant, vel quæ clariùs sunt cogitataæ. Præterea, non pauci, etiam recentiores philosophi, duplèmem memoriam distinguunt: primam vocant *sensitivam*, quia a sensu ortum trahit, vel *animalem*, quia hominibus cum brutis communis est, et in confusa idearum reproductarum recognitione consistit, seu in apperceptione ejusdem ideæ tanquam in diversis perceptionum seriebus contentæ, dum nimis eadem idea vi sensu et imaginationis simul, bis, vel si solius phantasiæ, semel, sed cum ideis sociis, producitur: v. g. idea arboris in horto sensu oculi, et idea arboris in silvâ olim vise vi phantasiæ producta. Alteram dicunt *memoriam intellectualem*, vel propriè reminiscientiam, quæ soli creaturæ rationali competit, et in distinctâ idearum reproductarum recognitione consistit, sive in judicio, quòd eamdem ideam jam ante habuerimus: sic arborem proceram in horto videntes judicamus nos alias arborem proceram in silvâ vi-disse. Hæc ideo paulò fusiùs et subtilius relata sunt, ut veterem et recentiorem philosophiam in decursu cum *Theologiâ Mysticâ* conciliari posse demonstrare valeamus.

§ 96.

MEMORIA MORTIFICANDA.

Memoria igitur adjuvante phantasiâ cogitationes vanas multiplicans mortificanda et corrigenda est. Ut enim S. Bernardus exponendo pergit, *Serm. 31, de tripl. gen. cog.*, tria occurunt genera cognitionum, a quibus sollicitè cavere sibi debent qui dignum Deo templum in se præparare student. Primæ sunt cogitationes otiosæ, quas ut simplex lutum excutere oportet. Aliæ sunt violentæ, fortius adhaerentes, et ad